

13306/P 42557
T E N T A M E N

M E D I C U M

D E

A S C I T E ,

QUOD Deo duce & auspice Dei-parâ , in Augus-
tissimo Ludovico Medico Monspeliensi , tueri
conabitur ,

A U C T O R ,

P E T R U S B E N Z I N , è loco Saut de Navailles ,
Diœcesis Aquensis apud Vascones , Liberalium
Artium Magister , & jamdudùm Medicinæ Alum-
nus , die 12^a. mensis Februarii anni 1775.

Pro Baccalaureatûs gradu consequendo.

Chronicis quidem morbis sui sunt quandoque paroxismi acu-
torum æmuli , præcipuè ubi jam fatum , misero imminet ægro ,
& acutorum aliquandò multi in chronicos desinunt.

Cheyne de infirm. sanit. tuendâ.



M O N S P E L I I ,

Apud AUGUSTINUM-FRANCISCUM ROCHARD , Regis & Universitatis Me-
dicinæ Typographum unicum.

M. DCC. LXXV.





TENTAMEN MEDICUM

D E

A S C I T E.

Præternaturalem fluidi cujuscunque, in quâdam corporis parte collectionem, hydropem vocant authores. Dividitur in universalem, & particularem. In universali, totum corpus, in particulari vero, unica pars aquis occupatur; nempe cavitates naturales, cerebrum, thorax, abdomen, uterus, ovaria, scrotum; undè hydrops capitis, seu hydrocephalus, hydrops pectoris, uteri, scroti, &c. Vide Nosologiam D. *De Sauvages*. De Ascite tantùm hic agere nobis est animus.

Ascites rectè definitur, tumor abdominis, à fluido quocunque in illius cavitate contento, originem ducens. Potest autem colligi fluidum istud, vel in superficie viscerum, undè ascites propriè dictus, vel in sacco quodam particulari, undè hydrops saccatus, gallicè *hydropisie Enkistée*.

Multis à causis, originem sibi vindicat ascites, quas in generales & particulares dividi necessum ducimus. Sanguinis & solidorum debilitas, causas generales, obstructions & scirrhî viscerum &c., causas particulares ponunt.

Debilitatur sanguis nimio alimentorum refrigerantium usu, nimis evacuationibus, nimioque potu, tandem nimia humiditate quâvis de causâ productâ, undè temperamento frigido, & humido donati, debiles & præsertim mulieres isto laborant affectu. 1°. Quod debiliori

corporis adversus externas, internas-ve insalubres causas renixu pol-
lent. 2°. Pessimo more ventrem thoracibus præcipue durioribus ac
rigidioribus comprimendi, sed nimis evacuationibus præsertim san-
guineis, produci valet ascites; videre est apud *Riverium* obs. 15. p. 556.
ascitem à nuntio sanguinis vomitu productum, à frequentioribus &
diuturnioribus narium hemorrhagiis; à mictu cruento. *Schenkius* obs.
lib. 3°. de hydrope. Eadem & similia videas exempla, apud *Lister*
exercit. medic. de hydrope. His calculum addit copiosior aquæ frigidæ
potatio, cerevisiæ vini &c. Vidit Cl. *De Haën* ascitem & alios hydro-
pes, à liquorum spirituosorum potu immoderato productos. Ab ictu,
in hypocondriis ortum duxit ascites. *Mead præcept. & monit.* à polypis
ventriculorum cordis, ab ipsiusmet valvulis offensis. *Sepulchretum*
Anatom. de Bonet. Tunc temporis fit hydrops, ab impeditâ circulatione,
& motu cordis; ut probatur experienciâ sequenti, ligatâ magnâ arte-
riâ seu venâ cavâ canis, tumescit sanguis, ista vasa maximè distendit, flui-
dum seu serositas sub formâ vaporum, antea defluens, nunc sensibilitèr
in cavitates depluit, & diverso pro varietate locorum, hydropi or-
tum præbet. Omnia ergo quæ libero sanguinis transitui nocent, asciti
ansam præbere valent. Mentio est apud *Slevooght* duorum hominum ascite
correptorum, à ligaturis abdomen fortius astringentibus oriundo,
videntur non rarò mulieres quæ post partum citius aeri frigido, hu-
midoque sese exponentes, tali morbo obsidentur.

Febribus continuis, acutis, intermittentibus, præsertim quartanis,
ob intempestivum nimiumque kinæ-kinæ usum, ictero, cachochimiæ,
morbis chronicis, & exanthematicis, scabiei retropulsæ &c. succedit
ascites. Vide Nosologiam D. *de Sauvages*, vidit Cl. *De Haën* mulierem
quæ post febrem diuturnam, menstruis carens ascite laboravit. Plu-
rima istius modi, apud authores videnda dantur exempla.

Causas inter particulares, primas tenent, viscerum obstructions &
scirrhi, præcipue verò hepatis, lienisque; constat etenim hæc sæpius
affici, legere est apud *De Haën* quamplurimorum hydropicorum histo-
riam, quorum obstructum & scirrhosum hepar sicut & lien, post obi-
tum videbantur. Vide *Riverium*, obs. sextâ & decimâ... Noscitur au-
tem obstructum hepar, pallore vultûs, segnitie & debilitate, gravi-
tate in hypocondrio dextro, spiritu difficili præsertim, si concitatiore
æger ambulet cursu, ex eo quod amplius jecur diaphragmatis motui
nocet, pulsu inæquali, pondere in latere cui innititur ægrotans, illi
per similes quod percipiunt cibis impleti. Noscitur scirrhus laborare,
jecur, duritie & renitentiâ, in dextro hypocondrio, difficiliore in latus
sinistrum decubitu, ob compressum ventriculum. Iisdem ferè signis
noscetur obstructum, seu scirrhosum lien, in obstructo gravitas, & in
scirrhoso durities, & renitentia in sinistro hypocondrio percipiuntur.

obstructione seu scirrhis affecta alia viscera, sicuti ventriculus, renes, mesenterium, asciti ortum præbere gaudent, quod invictè probant aperta cadavera à D. *De Haën* vide Rat. Med. Sed ab affectis hepate, liene, aut aliis visceribus non omnis, originem trahit ascites, nam non mirum inquit *Scherbius* referente *Morganio*, viscera gangræna obfessa post mortem reperiri, dum tractu temporis id in omnibus hydropicis, fit conspicuum.

Facilius confirmatus, quam incipiens dignoscitur ascites. Aliis enim incipiens, aliis confirmatus stipatur signis. Incipit malum cum torpore, gravitate, ad motum impotentiâ, sensim crescit abdomen, adest spiritus solito difficilior, ædematosus est pedum tumor; sub vesperam crescens, manè verò evanescens; & in faciem diffusus, palpebras potissimum manumque alterutram in quâ decubuit æger occupat, urina paulatim minuens fusca est, subrubra, lixiviosa &c. in confirmato, verò adest moles abdominis grandior; vidit Celeberrimus *De Haën* abdomen adeo aquis distentum, ut ad media usquè femora descenderet. Vidit D. *Savary* mulierem hydrope laborantem, cujus abdomen, novem pedes & ultra circuitu superabat: quinque verò pedibus orificium ventriculi, ab ossibus innominatis distabat. Tumor illius mollior ac latior, qui per latera compressus, aquarum illius in cavitate contentarum, fluctuationem percipi finit. Sæpè sæpius paritèr ab ægro in alterutrum latus converso, velut fluctuantis aquæ murmur percipitur, difficilem spiritum trahit, ut sæpè erecto trunco in lecto jacere cogatur, molestâ urgetur tussi, quæ tussis non tantum à fluido in abdomine contento, sed adhuc à visceribus suâ de sede repulsis originem habere gaudet; legere est apud *Monro*, in notatis D. *Savary*, historiam mulieris, à septem retrò annis hydrope correptæ, cujus apertum cadaver, ostendit, viscus nullum, si vesicam excipias, suum occupare locum, sed sursum cuncta repulsa, diaphragma ita prementia, ut ne suffocaretur ægra, in periculum sæpe sæpius fuerat; his calculum addit alvus sicca constipata, urina, lateritia, fitis intensa, & in dies crescens &c.

Distinguitur ascites, ab anasarcâ, ab hydrope saccato à tympanite, à graviditate, ab hydrope uteri &c.

1°. Ab Anasarcâ differt ascites, ex eo quod in anasarcâ totum corpus, in ascite verò abdomen tantum aquis occupatur.

2°. Ab hydrope saccato, hic sacco quodam particulari, inclusum; ascites verò totum per abdomen fluctuans habet fluidum. In hydrope saccato adest tumor circumscriptus, durior & renitentior, fluctuationeque carens, saltem sensili; fatendum tamèn sentiri posse fluctuans fluidum, ut refertur ab authoribus inter quos Celeberrimus *De Haën*, & ideo cysticum hydropem, pro ascite, salutari posse; fluctuationem

percepisse ratus isdem Cl. Auctor, paracenthesim instituit apud mulierem, sed qui fluctuare, illi videbatur locus, verus saccus fuit, humore glutinoso, & tenaci plenus. In ascite sæpè sæpius inodorum & limpidum, in hydrope vero saccato, fuscum glutinosum, & maxime foetens educitur fluidum, aliquoties tanta acrimoniâ & putriditate donatum ut nunc diaphragma corrosum perforasse, & eosdem ac vapores pestilenciales effectus, habuisse constet; legere datur in *Trans. Philos.* n°. 454 sect. 4. Chirurgum quemdam aquis ascitici, paracenthesi educitis, pustulis malignis in utrâque manu laborasse.

Dum spectant oculi læsos læduntur & ipsi,
Multaque corporibus transitione nocent.

Hic roseo genarum colore, vultus pedumque naturali habitu, ille verò, partium superiorum macie, & inferiorum inflatione stipatur; quæ tamen inflatio à cunctis tanquam pathognomonicum non habetur signum, videmus etenim mulieres prægnantes, & aliâ quâvis de causâ catamæniorum suppressione laborantes, haud raro eodem donari signo, videntur & etiam senes habitu corporis pleniori præditos, diuturnum post morbum tumore surarum hydropicorum more corripì, quin tamen ab eo incommodum ferant. Lento hydrops saccatus, ascites verò celeri pede, sua percurrit tempora, rupto sacco, potest hydrops saccatus, verum in ascitem mutari, ut aliquando observandum venit.

3°. A tympanite differt ascites, hic ab aquis ille vero ab aere, flatibus, materiâ mucosâ stercoreâ ventriculum & intestina replente, originem ducit. Ægro supino jacente, distentum & durum manet abdomen, instar tympani sonum edit, abest fluctuatio, quâ in explorandâ, decepti *Celeb. De Haen & Duverney junior* frustra paracenthesim instituisse fatentur, de complicato, tympanite cum ascite, erit suspicio, si signis suprà recensitis jungatur pedum œdema &c.

4°. Ab hydrope uteri distinguitur ascites, tumore fundum hypogastrii occupante, in ascite verò totum tumescit abdomen, catamæniorum suppressione, sæpè sæpius afficiuntur uteri hydrope laborantes, vidit *MARCELLUS DONATUS* mulierem istius prædam morbi, regulari mensium fluxu donatam, sed à vaginâ tunc temporis venisse sanguinem observavit. *Vid. Astrucium mal. des femmes.* Fluctuationem, percusso abdomine exhibens hydrops uteri, non rarò mentitur ascitem.

5°. A graviditate differt ascites; macilescunt asciticorum partes superiores, gravidarum verò tumescunt pectus & mammæ; adest lac, infra umbilicum sedem habet tumor, acuminatus fastigium atque emi-

mentiam præ se ferens; mollis tumor asciticus facile prementi digito cedit; in graviditate verò renitentior & fluctuatione carens, tactu percipitur; foetus tandem se præbet commotio; tertio saltem aut quarto mense, melius se habent prægnantes; ascites autem, quo ulterius progreditur, eo majoribus itipatur incommodis. Non negandum tamèn adesse casus, præcipuè secundo tertio-ve mense, in quibus decipi possunt Medici, & graviditatem pro ascite salutare; sic Clariss. D. *De Haen* graviditatem à celebrioribus in arte viris, eo usque tractatam vidit, donec in lucem prodiret vivus hydrops. Vid. Rat. med.

Mentio est apud authores, de hydrope inter peritonei laminas sedem habente, & sæpe sæpius verum ascitem mentiente, sed attendatur ad dolorem obtusum, ad levem tensionem initio morbi, ab ægro perceptam, eundem tumor & aquæ servant situm, in ascite vero sedem mutant & ad decliviora decurrunt; faciliorem quam in ascite spiritum ducunt ægri, siue ambulantes, siue ascendentes, minori siti & ciborum fastidio detenti, meliori vultûs habitu pollent, major adest urinarum excretio; attendatur etenim ad urinas necessum ducimus; si naturali copiâ, hydropem saccatum, si minori excernantur, ascitem adesse credere est. Pariunt mulieres peritonæi hydrope laborantes, majori quam in ascite, irregulari tamèn mensium fluxu, gaudent, diu innoxie, vitam agunt, legitur apud *Monro* historia mulieris ob catamæniorum suppressionem, tali hydrope laborantis, quæ septem per annos monstruosè inflato abdomine, pondere tantum aquarum querebatur, aperto cadavere centum & ultra aquarum libræ inter peritonæi laminas, apparuere; talia videas exempla apud *De Haen*, apud *Mead*. præcept. & monit.

In ascitis prognosi instituendâ, attendatur ad causas, ad partes affectas, ad symptomata, ad morbi diuturnitatem ad ætatem, ad vires & ægrorum idiosyncrasiam.

Quoad causas, an à generali, an verò particulari, ortum ducat ascites diligenter observandum, si à generali periculosus, si à particulari eo periculosior quod laborant viscera &c.

Eò curatu difficilior ascites, quo inveteratus, in inveterato ob nimiam aquæ incubationem, inflammatione scirrhis, & putriditate non rarò obsidentur viscera, Vid. Sepulchr. Anat. *Bonet*, & Rat. Med. D. *De Haen*; & juxta *Hyppocratem* sanis visceribus aut saltem à graviore immunibus affectu, polleant ab hydrope servandi. Ideo pariter ut plurimum artis præsidia contemnit ascites, quod ignorentur ejus principia, quod morbis chronicis aut acutis succedat, juxta illud medicinæ parentis effatum; *hydrops morbo acuto superveniens, malus, neque enim sedat febrem sed dolorem, admodum infert ac mortem*. Incipiente hydrope, alvi profluvium sine aperiâ seu cruditate proveniens malum

solvit, in inveterato vero eo peioris est ominis quod ob morbi diuturnitatem frangantur vires; corruptione aut scirrhis laboret hepar, lien, aut alia viscera, & juxta *Galenum* qui cum scirrho hepatis alvi fluxu corripuntur, citissime moriuntur. Ad extrema pariter ventum est, ubi mala magnaue ulcera, in ore, gingivis, subnata videntur, ubi sub infirmis viribus ingenti dyspnœæ jungitur diarrhœa, sic enim loquitur *Avicena* *constrictio anhelitus, & solutio ventris in tribus diebus mortem significant.*

Omnis hydrops periculosus sed eò periculosior quò nobilius afficitur viscus, sic ascites ab obstructo hepate, majori, quam ab obstructo liene, donatur periculo: paucissima, & nulla ut ita dicam, salutis spes affulget si ab inflammato seu scirrhoso ventriculo originem habeat ascites. Hydropem ventriculi aliquando mentitur ascites; videre est apud *Blankart* historiam hydropici paracenthesim passi, cujus apertum cadaver ostendit ventriculum, ulnam magnitudinè superantem, ita ut sectio quæ puncto abdomine, aqueas ferè centum libras eduxerat, reperiretur eam ex cavo eduxisse stomacho.

Auxiliis infra assignandis aliquoties fugatur incipiens, aut recens ascites, si sanis aut saltèm parvo obsessis affectu, gaudeat visceribus æger, secùs, res in ambiguo versatur.

Principiis obsta ferò medicina paratur;
Cum mala per longas invaluerè moras.

In eo ergò jacet salutis spes, hydropè laborantium, quod bonis visceribus, simul & viribus polleant. Adultus sæpiùs quàm adolescens aut ætate provectus, vir, quam mulier, ascite liberatur. Viribus majoribus gaudens, fortioribus catharticis, sæpè ascite debellandæ omninò necessariis, innoxie uri potest; dum adolescentes senes aut mulieres, remediis etsi levibus malè habentur.

De salute adhuc sperandum, si liberum spiritum ducat æger, si non tussiat, si externis partibus non sit colliquefactus, si toto caleat corpore, si non fitiat, si vero à cathartico dato magis intumescat abdomen, & velut tympaniticum evadat, mors ostia pulsat.

Aliquando à remissis symptomatis pessimum; sic v. g. fitis, ante mortem remittitur, quia sentiendi vis jam hebescit.

Sicuti de diagnosi ita de prognosi certiores faciunt urinæ medicum, quo minor eorum copia eo deterior morbus, quia ut plurimum ideo materia potulenta in ventrem confluit, ex eo quod inflammatione aut scirrhis corripuntur renes, & res tunc temporis in Angustissimo est; vide apud *Sepulchret. Anatom. Bonet. Observ. Plateri & Dodonæi*, ascitis salvo hepate, & liene, ab urinâ facti,

effluente ex rene, aut ex vesicâ ulceratione perforatâ : ut bonis ægri rebus fiat quædam serositatis evacuatio minui simul debet abdominis Moles, sin autem exhauriantur vires, paucissima salutis spes affulget. Si à perruptis, aut corrosis ureteribus, vel vesicâ originem habeat ascites, lethalis; tandem à quâcumque causâ. Procedat urinæ paucitas in ascite, maximè si febris jungatur pessima, ut ait divinus medicinæ parens, in coacis, *hydropico febriculoso, urina, pauca, turbataque, lethalis, contrâ vero si augeatur bene sperandum*. Si ergo humor per urinas excretus, assumptum potum, copiâ superet, secundæ valetudinis spes est, secus verò in angusto versatur res. Ideo jubent authores, singulis diebus, urinam & potum metiri. Quò magis à statu naturali, recedunt, & quo plures exhibent colores urinæ, eò majus adest periculum. Paracenthesi paractâ, vomitus sequentes pessimum præbent symptoma; ex aquarum eductarum colore, qualitate, odore, tumoris imminutione, præfagia sumas. Si citrini coloris, benè sperandum, si purulenti, sanguinolenti, viridescents, odoris, putridi &c., pessimum. Minus quàm anasarca, magis quàm hydrops sacculus, debellatu facilis est ascites, 1°. propius parti affectæ applicantur remedia 2°. facilior aquarum expulsio.

Curacionem ascitis aggrediens, tribus satisfaciat medicus. 1°. Aquas in cavo abdomine contentas inde, expellat; 2°. eductis aquis, causas, emendet, tollat » 3°. sanguinis viscerum, partiumque solidarum, debilitatem, corrigat. Educendæ sunt aquæ, vel viis naturalibus, sicuti vomitu, catharsi, diuresi transpiratione &c., vel artificialibus nempe scarificationibus, & paracenthesi, de quâ inferius. In eo conducunt emetica, quod virtute suâ stimulant, solidorum oscillatione, & fluidorum motu aucto, unâ cum mutuâ viscerum compressione, attenuant fluida; & sic bonis ægri rebus ejiciuntur; mentio est apud *Duverney* Mém. de l'Accad. des Sciences, 1703, mulieris ascite laborantis, quæ frustra cunctis simul & paracenthesi, tentatis remediis, emeticorum usu fuit liberata. Sed cautâ & sapienti adhibeantur manû, quamvis enim ægrotantes habitu fortissimo, in specie præditos habeamus, non ideò, fortioribus emeticis, aut cathartics sunt tractandi; sciscitandum ergò prius de eorum idiosyncrasiâ, an facile an verò difficile vomitui pareant, & tunc feliciùs curam aggrediemur, quot enim à fortioribus emeticis gravissima! cautissimâ manû utantur emeticis hemorrhagiis obnoxii, nec-non debiles, qui simul ascite & asthma afficiuntur videre est apud *Monro* historiam mulieris, quæ assumptis, in asthmatis paroxismo, emeticis, motibus convulsivis fuit detenta, nigrescente, vultu, & monstrosè tumefactis venis, jam deerat pulsus, & respiratio; dum sedem mutans ægra, vomitum edidit quo fuit liberata.

Si verò danda judicemus emetica, incipiendum semper à levioribus, v. g. kermes minerali, ipecachuanâ &c. & tandem ad fortiora deveniendum, si res postulet, hæc sunt turpethum minerale, tartarus stibiatus, vitrum antimonii pulvis algaroth.; infusio croci metallorum, ab uncia semiss. ad uncias duas, etiam purgatu difficillimis, à *Sydenhamo* commendatur; sed majori donatur successu in grandiore ascite quam in leviculo ventris tumore, tunc enim evacuationibus per inferiora committenda venit res. Multiplici constat experientiâ parcâ dosi adhibita emetica evacuationes serosas nunc per anum nunc per urinas excitasse, repeti debent emetica pro viribus ægris.

Ut bonis ægri rebus, suadente *Sydenham* adhibeantur cathartica, observandum, in omnibus hydropicis, segniùs vel minus potenter operantia, nocere magis quam prodesse, debilitè corpus pervadunt & quod secum adducere nequeunt, promoventia, sanguinem exagitant, undè tumoris aucta moles, attendendum tamèn, ut de emeticis superiùs dixi, ad ægrorum idiosyncrasiam; vidit author mox laudatus, hypercatharses, à potionibus etiam lenientibus; sed præcæteris morbis cathartim validissimam exoptulante ascite, ne viscera putrescant, non à purgantibus abstinendum, modo vires, ferant, donec omnia ex cavo abdomine fugerint fluida. Sed quotiès æger constitutione est infirmiori, diureticis res credatur, quia fortioribus & frequentius usurpatis purgantibus, debilitatur corpus, juxta *Galenum*. Non ergò illos sectemur qui omnia tentantes, debiles aliundè vires, ultrà projiciunt, atque ægros ut ita dicam ante fata necant, sed eam in dandis applicandisque auxiliis prudentiam, adhibeamus, quâ viribus præprimisque vitalibus, religiosissimè parcamus. Parcâ dosi adhibita, sed diu continuata purgantia, valdè commendat Celeberrimus *Monro*, de idiosyncrasia & viribus ægrorum, in quibus lentè opus suum peragunt leniora purgantia, v. g. senna rhabarbarum, mercurius dulcis, &c. certiores facti, ad fortiora deveniamus, primas tenent syrupus de rhamno cathartico, quo solo asciticam curavit *Sydenham*. Elaterium potenter vires suas exerens in alvo conturdandâ, à granis duobus exhibitum, usquè ad decem & ultrà; gummi gutta &c. hydropes alia irridentes remedia, debellavit celeberrimus hujus *Ludovicæi* Professor *D. Venel* adhibitis gummi guttæ septem aut octò granis, sali alkalino kali admixtis; ad hæc accedunt, succus ireos nostratis recentèr extracti, ab authoribus maximè laudati, hydropico, inquit *Platerus in Observationibus*, cuidam propinavi, succum ireos ut biberet ad uncias duas aut tres, addito melle, undè plurimùm minxit & dejecit, & postquam repetiisset, bis aut ter, detumuit venter, pedesque, subse-

derunt sicque sanatus est. Succus ireos nostratis unciis tribus, cum mannae uncia semiss. rusticum ascite liberavit *Riverius*. Optimè pariter aliquando hydropem expugnat cortex interior sambuci, in aqua & lacte simul decocti; potest enim vomitionem & catharsim promovere, & ideo mirè ad hunc morbum debellandum conferre. Purgationum vice, conducunt & etiam enemata. Recipe pulpæ colocynthidis drachmam unam, infunde per noctem in vini albi unciis tribus, colaturæ adde decocti intestinorum vervecis, libram unam, olei olivarum uncias duas, salispetræ unciam unam, aceti fortis cochlear unum, fiat enema. Si fortè validioribus emeticis, aut catharticiis, nimis exagitetur corpus, aut superveniant, convulsiones, guttis anodynis, syrupo papaveris rheados, diacodii &c. compescantur.

Quoties se præbent ægrotantes catharticiis & à fortiori, emeticis uti nequeunt; diureticis tota committatur res, his enim loquente *Mead*, minùs franguntur vires, & ut jam dixi, exhaustis viribus nocet vehemens per alvum purgatio, & quo plus humoris, ex intestinis ejicitur, eò major ipsius copia brevè in ventrem refluit. Incertissimæ, quidem tunc temporis, sunt virtutis diuretica, etiam præstantissima, quæ enim in hoc votis respondent, in illo spem fallunt, aliud igitur atque aliud tentandum, & quæ ex his evenere bona prædicantibus magni nominis authoribus, negare nequeunt; ad illa tanquam ad sacram anchoram confugere debemus. Meliora à nobis habentur, ex salibus lixivialibus genistæ tamarisci juniperi &c. constantia. Legere est apud *Mead* historiam mulieris, quæ cathartica validiora, & triplicem paracenthesim passa, ascite tandem fuit liberata, devorato per aliquot dies manè & vesperè, pleno cochleare seminum sinapis, non contusorum, decoctique summitatum viridium genistæ semilibrâ insuper haustâ. Plures sanavit hydropicos. *D. Savary* solo juniperi baccarum ex vino albo lixivio, & aquæ nitrosæ parti æquali mixto, eadem videas exempla apud *Lister Tractat de Hydropè*. Lixivium, inquit, *Mathiolus*, ex vino albo & juniperi cinere paratum, quatuor aut quinque unciarum pondere *Haustrum*, valentissimè urinam pellit, ita ut nonnullos viderim hydropicos; hoc tantùm auxilio sanatos: allio usus quidam rusticus, ascite laborans, copiosè minxit & brevi sanatus est, *Burnet Forestus*. Hydropem debellavit terrâ foliatâ tartari, *Amplif. Canc. D. Barthez*. Languescente urinarum secretionè, cremorem tartari valdè commendat *Clarss. D. Tissot*. Hoc bonis ægri rebus usus est, *Morgagni*; curam ascitis habuere mille pedes; cautissimâ manû adhibiti à non nullis prædicantur cantharides. Noxia in genere in asciticis venæ sectio, feliciter tamèn admittetur præprimis apud plethoricos, si ab evacuationibus

suppressis aut viscerum inflammatione, ortum trahat ascites, vide *Hoffman* & *Sponium*, qui viginti venæ sectionibus ascitem ab hepatis inflammatione oriundum fugarunt, si ab hæmorrhoidum fluxu, cohibito, ano applicentur hyrudines necessum ducimus.

Sudorifera cum diureticis maritanda suadent nonnulli, sed nimiam ob debilitatem magis nocet sudor in ascite quam prodest; bono tamen omine adhibentur non raro, si ab scabie, impetigine aut aliis morbis cutaneis reperiuntur, natales habeat ascites, ut observavit celeberrimus D. *De Sauvages*; alii tunc temporis inoculatione, alii verò inter quos amplissimus Cancellarius D. *Barthez*, vesicantibus morbum revocari volunt. Vesicante furis admoto, simul & saponaceis intus assumptis, hydropem nupèr debellavit, mihi amicissimus, Illust. D. MINVILLE apud Bearnos Medicus; sed timendum à gangrænâ, quo in casu mirè confert theriaca, radix serpentariæ virginianæ, cortex peruvianus &c. si ab hepatis aut alterius visceris obstructione oriatur ascites, remediis ipsi dicatis utendum, v. g. præparationibus scilliticis vino & oximelle scillitico, pillulis scilliticis Edimburgensibus sapone veneti &c. De aliis figillatim, agere nostræ vetant dissertatiunculæ limites.

Cibo levi, & generis durioris vescatur æger, potum fugiat aut saltem non ultra detur quam ut vitam sustineat, anteponatur urinam movens; multiplici constat experienciâ solâ potûs abstinentiâ fuisse curatos asciticos. Solo pane & uvis, pro potu & cibo vescentes, non nullos vidit ascite liberatos Illust. D. *Hunter* Londinensis.

Viis naturalibus ejici negante hydropicorum aquâ, alii paracenthesim, alii scarificationes, cruribus & in talo fieri volunt, vide *Mead Præcept. & Monit. Boerhaave*, & ut *Celsi* verbis utar, incidendum quoque super talum, quatuor ferè digitis, ex parte interiore est, quo per aliquot dies frequens humor feratur, atque ipsos tumores incidere, altis plagis oportet, concutiendumque corpus est, multâ gestatione, atque ubi inductæ vulneribus cicatrices sunt, adjiciendum exercitationibus & cibis, donèc corpus ad pristinum statum reveſtatur, *Celse* lib. 3^o. cap. 25.

Nos verò, integris viribus, & semper expertis aliis medicamentis, ad ista confugi volumus; quotiès ad talia concurritur auxilia, vitentur pro posse, vascula sanguifera, nervosa tendines &c.

Paracenthesim commendant authores nonnulli, observationibus *Parè* suffulti, juxta quem celeberrimum virum, hydropicus, immisso in abdomen ab inimicâ manû cultro, sanatus est. Idem & similia videas exempla apud *Haller*.

Quamvis tamen istis ab authoribus sic habeatur paracenthesis,

rarissimè secundis ægri rebus adhiberi valet, quot instituit paracentheses, non satis laudandus D. *De Haen*? Quàm pauci eo curati fuerunt auxilio? Non negandum tamèn aliquando pallians præ se ferre remedium, in eo quod ut ait *Celsus*, non sanat emissus humor, sed medicinæ locum facit. Volunt authores maximæ notæ, in desperatis tantùm casibus, & ut certa aliquò procrastinetur perniciēs adhiberi paracenthesim.

An simul omnis aqua, an verò partitis vicibus sit ejicienda, adhuc sub lite est. Meliùs quidèm foret omnia fluida simul foras ejici, ne nimia aquarum incubatione putrescant viscera; sed frequentiori constat experiētiā quam plures, tali adhibitā medendiratione, subitā morte fuisse raptos, videre est apud *Slevooght* historiam puellæ à decem annis hydropē laborantis, quæ paracenthesim fuit passa, simul omnes eduxit aquas chirurgus, sed exhaustis viribus, quatuor post horis, obiit puella.

Cavendum ergò, suadente *Mead*, non in paracenthesi tantùm, sed etiam in omni incisione, in quādam corporis, parte, aquarum educendarum causā, factā, ne nimis indè exhauriantur vires, eas enim æquè prostermit humor emissus, ac si tantundem sanguinis efflueret.

Partitis vicibus, aquas educi, & simul servatā proportionē, non tantùm post paracenthesim, sed etiā post assumpta cathartica abdomen linteo comprimi necessum putamus.


Laudat clariss. D. *Morand*, Chirurgum, qui paracenthesi minimè contentus latā plagā, saccum abducere tentat, sed timeat gangrænā, in cachochimico corpore, mortis nunciam. &c.


In desperatis quidem casibus, curationem omni ope moliri debemus & neque animo cadere, nequè ægro ut cadat authores esse debemus; sed illius vitæ nostræque famæ consulentes, viribus vitalibus religiosissimè parcamus, prætereā, noctū diūque rebus nostris invigilans natura aliquandò spontè suā, mirum in modum machinatur quo nos à perniciosis morbis muniat ac tueatur, vide apud *Mead* præcept. & monit, historiam mercatoris ascitici, cujus manè paracenthesi, erat aperiendum abdomen, sed nocte absorptis, ignotā viā, omnibus fluidis; nullā se jam ampliùs egere curatione dixit ægrotans.

Non sui curam negligat æger, paracenthesim passus, ne denuò eundem im morbum sæpissimè nullis remediis domandum incidens, eandem operationem ferre cogatur, legere est apud Clariss. D. *De Haen* historiam hydropici qui suā curā neglectā, selectiora incassum accepit remedia, crevit ita hydrops ut, exacto à primā paracenthesi mense, altera, institueretur ne suffocaretur, simulque & naturā & copiā ma-

teriem educeret, id quod deinceps quovis mense fuit repetitum. Ex eo autem longè citius post paracenthesim quam antea recrefcit hydrops, quod vasa, liquores, in abdomen ferentia vix contrahantur; ideo aquis jam penitus evacuatis ad istorum vasorum, sanguinis, viscerum, partiumque solidarum debilitatem, corrigendam, prope-
randam, ut novus aquarum provectus præcaveri possit, quod calefa-
cientium corroborantium, & præprimis, astringente virtute, donato-
rum obtinebitur, quia non tantum præternaturales sistunt effluxus,
fluidorum, astringentia; sed etiam atoniam, & fibrarum relaxatio-
nem tollentia, sanguinem corroborant, meliora & à *Sydenhamo* com-
mendatiora, sunt vinum generosum moderare sumptum, vinum ca-
narinum, vinum absinthites; magnis kinam-kinam laudibus effert
D. Stork; utatur æger, infuso amaro rad. raphan, rustici fol. cochlear,
absinthit, cen. min. & genistæ. Conducunt & etiam martialia cibis &
jusculis corroborantibus utatur æger, æquo curru-ve aerem, mutet.
&c. &c.

FINIS.





DISPUTATURI.

R. R. D. D. PROFESSORES REGII.

R. D. JOANNES-FRANCISCUS IMBERT, *Cancellarius & Judex.*

R. D. PAULUS-JOSEPHUS BARTHEZ, *Cancellarius & Judex Adjunctus.*

R. D. FRANCISCUS DE LAMURE, *Decanus.*

R. D. GABRIEL-FRANCISCUS VENEL.

R. D. CAROLUS LE ROY.

R. D. GASPAR-JOANNES RENÉ.

R. D. ANTONIUS GOUAN.

R. D. FRANCISCUS BROUSSONET.

R. D. HENRICUS HAGUENOT, *Decanus Professor Emeritus.*

1892